

太极主四真人元君道经第二十七

“太极主四真人元君道经第二十七

上清大洞真经卷之五

茅山上清三十八代宗师蒋宗瑛校勘

左目童子章

谨请左目童子，名飞灵，字阳光，常守兆左目死炁之门，使兆阳生于内，清洁于外，二炁交通，四朗八会，彻见无方，万神自泰。

真思左目童子飞灵真炁，日华之色，罩于顶上，乃默呪曰：

四极太灵，元君精瑛，日华充溢，童明流光，二景相照，通我明梁，三丹启真，我道开张，翠羽罗裙，飞上玉京。



次思日之华光从兆泥丸中入，兆乃口吸神云，咽津三过，结作一神，状如太阳星，手执日光，下布绛官，穿玉茎中，入尾闾穴，入脊髓，上入第一椎，穿泥丸，入左瞳人内，摇睛七过，不得动右睛，顺时吐息。

诵玉经。

大洞玉经曰

太极主四真，凌羽逸上清，七转召司命，太一扬威明，司录促诣位，三举登震灵方丈符，魔王来受事，仙官束鬼精，日中青帝母，号曰芬艳婴，太张黄素上五符，安来紫素上玉名，混化六合内，洞房列火兵，去兆死籍，名迁玉门东华，帝一保身，五老卫神，上登太明天国，金轮霄玄。

太上高晨玉清王祝曰

我乘混合炁，缠固九真丘，养光脾神太昌子，骈罗凝羽珠，九尊众帝生九帝子，洞景徊须臾，七祖结解散，秽积忽已除，世生福昌，玄玄获仙书，身升太霞宫，控龙宴玉虚，上朝上清皇，寝兴幸正扶斗中内妃。

毕，乃口微祝曰：

天上内音，登来张，乘法谟。

地上外音，灵寿台，宜生人。

大洞左目童子飞灵消魔玉符

诀曰：当朱书黄缙，佩之，存呼童子内讳名字，镇我左目之瞳。乃叩齿七通，咽液七过。

